

ALIWIFO

SOLA 24



Samschtig

AHREISETAG

Am Morge händ mir am achi am Gmeindsplatz aattrettte gha, wos zum glück nume es bitzeli tröpflet het. Det hend mir au de Asterix und de Obelix s erscht mal troffe! Druhli simmer uf de Zug, doch de Zug het Verspötig gha, in Rotkrüüz Sind mer denn planlos gstrandet gsi. Dete hend mir aber denn mit de super coole Pios es tüüschlispil gspillt. Mit Chläberli hend mer aagfange und hend ois ufetüschtlet zu AirPod-case, Schoggi, und Würscht! Nachem Stadt Game und laaaaaangem warte hend mer den endlich chönne wiiterfahre, öpe Im Schritttempo... In Hildisriede aacho het ois denn de Miraculix, d Vitalia, de fründin vom Asterix und d Gutemine vo de Bushaltstell abgholt. Ufem Lagerglend aacho simmer gschockt vo de coole festig gsi und hend grad oisi Zelt drin uufbaut. Zum ois besser kennezlerne Hemmer denn no mit de Gallier es paar Spili gspilt. Nachher het s Dorffescht aagfange. Fürs lang ersehnte Dorffescht hend mir den s Zält dekoriert. Nachem Festmahl het de Majestix e super red ghalte vor ois und aaschlüssend het denn de Romantiker Asterix De Vitalia äfach en HÜRATSAATTRAG gmacht :)

Nachdem Hemmer chli wiiter gfäschtet, hend cooli Spili gspilt und hend de Aabig gnosse. Doch dänn hend unbekannti Bösi gwaltvoll d Vitalia und de Miraculix klaut!!!! Mir hend natürlich gaaar kei angscht kah;) Verzwiflet simmer denn d Geisle go sueche , doch leider vergebens. De Asterix isch KOMPLETT duuredrällt, was macht er nume ohni sinere Seeleverwandte de Vitalia. Wie sötted mir ohni de tränk vom Miraculix ois gege d Römer wehre?! Wieso hend si echt genau die zwei geklaut und nöd zum Biispil de superstarci Obelix?!

Während em ganze Tag hend d Pios en Spielplatz für Vierzejährigi baut mit enere Hollywoodschaukel und emene (nonig) Begebare Spinnenetz. D Pios hend denn no spat bis it Id Nacht gossipt und mir sind brav is bett;)



Sunntig UF DE SPUR

Hüt Morge hend di arme Pios müesse Morgesport mache, mir Wölfli hend das natürlich wiedermal mega lustig gfunde. Nacherem feine Zmorge Hemmer eus uf de Weg gmacht, zum usefinde wer d Vitalia und de Miraculix geklaut hend. UF eusere Suechi hend mir es Schwärt und es Schild gfunde. Mir glaubed dass isch e Spur vo de Römer wo d Vitalia und de Miraculix klaut hend. Zum sie finde hend mir Krokis gmacht. Nach em Stränge block, hämmer eus äs spannendes drü !!! aglost, werdendem d'wölfli geg d pios armdruckä gwunnä händ. Nachdem mir gnueg kah händ vo pios hügla, hämmers rezeptbuech vom mirakulix gstoläh zum probiere sin zaubertrank z'brauä. Deswege hämmer über verschideni chrütli glärnt zum usäfindä was eus stärchä chönnti.

Mir sind sogar go chrütli pflückä. Nacherem super mega feinä znacht hämmer vom Majestix s Gallier Abigritual glernt. Denn hemmer no en mega coole SingSong gmacht und nacheme schöne Gschichtili, vom erste Date vo de Vitalia und em Asterix, simmer friedlich is Zelt go schlafe. D Pios hend no de Match Spanie gege England gluegt wo Spanie denn 2/1 gunne hend. Alli sind glücklich gsi ussert de Artus, Tarantula und d Lavaja... Nacherem somene stränge tag, sinds denn au tod müed is zelt gheit.



Mäntig VORBEREITIG

Wo mer uufgwacht sind, sind mer immerno bestürzt über de verluscht vom Mircalux gsi, doch de Majestix het ja s sagenumwobene Rezeptbuech vom Mircalux gfunde, wo s gheimrezept vom Zaubertrank gsi isch, das het eus grad wieder chli hoffnig geh. Jedoch hemmier d Gheimzuetat immernonig gwüsst. Zum die usefinde hend mir die beschte zwei chrütl uusgwählt, mit dene mir den über em Füür en Zaubertrank braut hend, welle mier druufhii au gnüsslch verchoschtet het , hoffentlich würckt er

Zum ois no bessere uf de epischi Kampf gege d Römer vorbereite, hend mer ganz vil trainiert.

D Pios sind hüt uf de Hajk, ganzi 30 kilometer hends müesse laufe! Am abig hends sogar müesse en Schlafplatz bimene Buur sueche! Zum Glück münd mir nonig so wiit laufe! Die eine hend im Heu pennt (nöd sehr agnehm, chratzt), anderi inere Garage und die letscht Gruppe irgendwo imene Luxus-Eestrich.



Ziischtig

DIE GROSSI SCHLACHT

Grad nachem Zmorge het eus de Majestix en Brief zeigt wo er am Caesar per Tuube schicke wird. Es isch e Ufforderig zunere grosse Schlacht gsi! Mir hend abgmacht, dass wenn mir günned, kriegemier eusi gliebte zrugg, und wenn sie günned verlönd mir euses Dorf... Aber das isch ja eh keis Problem, well mit eusem Training und dem selbschtgmachte Zaubertrank sirup isches ja gar nöd möglich dass mir verlüred!

Am Morge hend mer grad die wiichtige Koch-Abzeiche prüefige gha, die herti arbeit het sich uuszahlt wil alli hend bestande! S neue abzeiche het ois no meh Motivation geh i dä schlacht gege d römer z gwünne, drum hemmer no de letscht fiinschlif i oisere Kampfmethode gmacht und sind it schlacht zoge.

Ide Schlacht hemmier alli en Ballon um eus ume kah und sobald dass de ballon vode Römer und Römerinne platzt worde isch, hemmer müsse usehocke. D Römer sind starchi Gegner gsi, also hemmer gwüsst dass mier euses beschte geh münd, zum d Vitalia und de Miraculix zrugg zbecho! Leider aber sind sie eifach zu starch gsi für eus, und euse selber gmachte Zaubertrank het nöd funktioniert... Sie hend gunne:(



De Caesar hets sofort klar gmacht, dass mir in zwei stund furt münd. Darum hend mir euse Rucksack packt und sind los zoge. Aber wo mir wiit gnueg weg gsi sind vode Römer Festig, het eus de Majestix es Gheimniss verrate! Im Zauber Buech vom Miraculix het er entdeckt, dass d Römer nach so eme Sieg immer so fescht Party mached, dass sie uh mega müed sind und mer sie eifach chönnti stürme...Drum simmer eifach echli gloffe und hend denn öppe 200m vo eusere Feschtig weg Berliner ufbaut. Sälber us Blache Zelt ufstelle isch mega cool gsi und mir hend de Abig verbracht mit Doseravioli, Pfadifuessball und emene wunderschöne sunneuntergang. Mir hend sogar chönne uf de Schüsserturm ufechlettere zum die wunderschöni ussicht gseh! Währenddem mir en schöne, ruhige abig verbracht hend, het mer nöd s gliiche chönne sege fürd Pios...

Am Abig sind sie alli vode Elua zemegrüeft worde zum binere spontane Nachtüebig für eus Wölfli mit zhelfe, was sie aber nöd gwüsst hend, isch dass das alles nur e cover story für ihri eigeni Nachtüebig gsi isch!! Scho vo ahfang ah sinds chli skeptisch gsi, aber hend denn trotzdem brav zueglost wo sie ihne gseit het was sie mache münd. Wo sie denn aber zum Wald gloffe sind, sind sie vomene dureknallte Druid entfange worde! Er het gfunde, dass er nöd het chönne schlafe und eusi hilf bruucht zum usefinde was los isch. Denn hemmier müsse en schreckliche Schnurweg laufe wo mir die ganz ziit vo böse Geischt verschrocke worde sind. Am endi simmer alli um es für ghockt wo de druid denn de gallischi verräter unter ihne entdeckt het! Was nachher passiert isch, isch vil zu schrecklich zum id Ziitig tue, drum lümmer eu das d Pios verzelle!



Mittwuch

ZRUG EROBERIG

Grad nachdem mier uufgwacht sind
hend miet oisi Zelt zemepackt und
hend ois uf de Weg gmacht zum d
Römer wieder vo oisem Zeltplatz z
vertriibe. Also hemmer ois langsam a
de Zeltplatz wo vo de Römer*inne
bsetzt gsi isch aagschliche und hend d
Römer den Erfolgriich inere witere
schlacht vertriibe, si hend so lang
party i de letschte Nacht gmacht das
si am nöchsche morge gar nüme
hend möge kämpfe, drum sind si den
au de ganzi Tag verschwunde.

Nachem Kampf hemmer sogar au no
d Vitalia und de Miraculux wieder us
ire Gfangeschaft befreit. Zum das
Fiire hez feini Gipfeli und Chueche
gäh, well mir de Geburi vom Lego
gfiirt. Direkt nachem Zmittag hend
mir den chli gwellnesst. Mier hend
oisi Nägel lackiert, hend
Quarkmaske gmacht, Gschichtli
gloostet, Handpeeling gmacht und
oisi Haar endlich mal Bürschtet.

Vorem Znacht hend mir en block kah
zum Thema Vertraue, schleichti und
gueti Gheimnis, das mer immer dörf
nei säge und wie mer sich ih
verschiedene Situatione cha hilf hole.
Nachem Znacht isches den mit em
Singsong wiitergange mier hend ganz
viil cooli Lieder gsunge und sind ums
Lagerfür rundume gesesse.

Churz nachem Zähputze sind usem
nüt e horde bösi geischter uf ois
zuegrennt und hend äfach de Lino
mitgno. Beschtürzt über das hend mir
natürlich de Lino wellä befreie und
sind hinedri glofe, dänn hets det en
super gruselige, mega creepy
schnurweg gha womir alli elei
gmeisteret hend. Am End vom
Schnurweg hemmer checkt, dass das
die böse Geister gsi sind wo cho sind
wil mir oises Ritual nöd Richtig
gmacht hend. Also het de muetigi
Logan mit em Mirakulix zemme s
Ritual gmacht, und sofort sind alli
böse Geister verschwunde. De Muet
vom Lino und vom Logan hend mir
belohnt. indem mir si uf de
Pfadiname Newton(Logan) und
Flash(Lino) tauft hend.
Die supercoole Pios sind am Morge
im Verkehrshuuus gsi und am
Namittag i de Badi:)



Dunnschtig

DE CAESAR

Hüt Morge isch de Caesar zu eus cho und het eus öppis verchündt: Er isch id Vitalia Verliebt und het sie drum entfüert!! Aber de Asterix isch ja scho mit de Vitalia verlobt also mir hend ihm abote, dass mir ihm es anders tolls meitli findet. Will er eus so cool gfunde het, het er ois mit sine Goldmünzte en Uusfluug it Badi spendiert. I de Badi am Sempachersee acho hend mer zerschr emal Zmittag gesse und sind dän in See. Mier händ spili gschnilt, sind vo oisere Leitere umegschpickt worde und hend sogar no es Glace vo de Lavaja gspest übercho. Nach de Badi hend mier wieder zrugg ufem Lagergländ gallischi spili baschtlet. Doch plötzlich während em baschtle isch äfach de Caesar mit enere noie chica um de Egge cho. Es isch äfach die wunderschöni Kleopatra gsi!!!!!!! Mier sind so glücklich, dass au de Caesar sini besseri helfti gfunde hetund das mier endlich friede mit em Caesar hend. Nachem superfeine Znacht hend mir no en Block gha wo mir drüber gschwätzt hend das de Caesar supermuetic, coole Typ isch. Nach de Zahputzparty wo MEGA abgeange isch sind mer uf de weg is Zelt gange.



Wo mer scho fascht am pfuuse gsi sind hend mir luuts gschrei ghört und de Caear isch äfach enrführt worde!!! Die böse lüüt hend au no gseit das sie später au ois no wennd hole. Drum hend mier müsse i zweiergruppe Nachtwach schiebe, doch die zweiti Gruppe isch dänn äfach au entfüert worde! Drum hend mier ois schnurstraks uf de Weg gmacht die entführte z sueche und am aafang sind mier äfach am Schnur weg verbigloffe (danke Chaplin) . Wo mer dänn de Schnur weg gfunde hend, sind die erschte zwei chind ufem Weg äfach au entfüehrt worde!! Wo alli de super gruseligi schnurweg gloofe sind, wo sogar öper druuf erhängt worde isch hend mer die Foif entführte(plus de Sturm wi scheiss gmacht het) bimene Füür vorgfunde. Die Muetig Rosa het de böse Römer dänn erchlärt wieso de Caesar nöd en verräter isch, sonderen eigentlich super muetig isch. Das het d Römer den Überzügt und drum hend sie die foif geisle freilah und sich mit ois aagfründet. Als belohnig für ihre muet hends dönn foif supercooli Pfadinäme übercho: Momo(Olivia), Minitou(Emilia), Vespa(Enya), Tortuga(Rosa), Chira(Romy). Die supercoole Pios hend de ganz Tag chlisport gmacht und sind ufem Lagergländ bliibe.

Friitig

D HOCHZIIT

Nach dere herte Nachtüebig, sind mir Todmüed gsi, also hemmier hüt chli dörfe uusschlafe. Eusi Leitere aber, sind scho frueh wach gsi zum euse First abzbaue. Zmorge hets denn im Wald geh, wos no schön chüel und Schattig gsi isch. Nachem Zmorge hemmer no chli glernt über de Bip, de Gründer vode Pfadi. Well mir aber so müed gsi sind, hemmer danach eifach echli spiele gspillt und hörspiel gloset. Nacheme Mega feine Zmittag hemmer eus no chli mit de pios beschäftigt und de letschi Tag gnosse. Am Nammitag isch denn d Vitalia ganz gstresst zu eus cho. I all dem Stress mit de entfüerig het sie überhaupt kei ziit kah zum ihri hochziit plane! Drum hemmier zeme mit Paar Römer und Römerinne Gruppe bildet, zum verschiedeni Aspekt vom fäschti zplane. Die einte hend Bluemestrüüs gmacht, die andere hend s hochziitschleid dekoriert und ring bastlet und die andere hend s altar gmacht und dekoriert.

Bevor de Hochziit hets denn aber no mega feini Burger geh und nach de ämtli hend mir eus ready gmacht fürd Zeremonie! Mit de Römer zemme zfiire isch no mega luschtig gsi, und d Trauzüge vom Asterix und de Vitalia sind sogar zwei Römerinne gsi!

Wos denn los gange isch sind mir alli gspannt ade tisch gsesse und hend zuegluegt wie de Obelix mit de Vitalia zum Altar gloffe sind. Dsunne isch am untergah gsi, Perfect vo Ed Sheeran isch gloffe und es heti nöd schöner chönne sie. Mir hend alli tränli die Auge kah und au d red vom Majestix isch atemberaubend gsi! Nachdem dases offiziel gsi isch hemmer alli gjublet und gfiiret und e mega schöni ziit kah. Denn het de Obelix sogar de Bluemestruus vode Vitalia gfange und grad nachher isch de Miraculix mit echtem Zaubertrank für eus alli usecho! Es isch meeega fein gsi!! Für de Abschlussabig hemmer denn no paar Uffürige zuegluegt bevor mer denn voll verzauberet is bett gheit sind.



Samschtig

HEIMREIS

Hüt morge immer mega früh gweckt
worde und hend sofort scho müsse
ahfange packe. Im Zelt isch das no
schwierig gsi well i somene coole Lager
het mer doch kei Ziit kah zums Zelt
amel ufruumme! Drum hemmer Socke
für Socke müsse euse Grümpel
zemeruumme und in Rucksack inestopfe.
Für das hemmer stabili 2 Stund
bruucht!! Denn hemmer aber fürs
letchte mal dörfe en mega Feine
Zmorge ässe bevor mer denn ahgfange
hend eusi Zelt abzbaue. Es isch uh
mega heiss gsi drum hemmer
möglichscht speedy alles abgruumt
bevor dass mer denn in Schatte go
warte sind. Die super mega liebe Pios
hend denn d Zelt no putzt, ufgrollt und
ihpackt<3

Zum Zmittag hets traditionellerwiis
Hotdogs geh bevor dass mer denn alli
zeme ab uf de Bus sind. Die laaaangi
Wanderig zu de Bushaltestell (200m de
hügel duruf) hettemer aber nöd
überlebt, hets Gotti vonere Leiterin nöd
für eus Paar schweeri Rucksäck
ufegfahre hetti. UF de reschtliche
Heireis immer mega müed im Zug
gsässe und hend ganz vil mitleid kah für
eusii Mitfahrer*inne wo mit eus hend
müsse im Abteil sii nach ere Wuche im
Zeltlager! Wieder in Meile hemmer eus
alli mega gfreut zum eusi Eltere wieder
gseh, aber werded no lang vom
Zeltlager mit em Asterix, Obelix,
Vitalia, Miraculix und Majestix
schwärmee. Sones cools Lager werdeme
sicher nie vergässe!

